

**DIRECCIÓN XENERAL DE DEPORTES
CONSEYERÍA DE CULTURA, COMUNICACIÓN SOCIAL Y TURISMU
DEL PRINCIPÁU D'ASTURIES**

ASUNTU: ESCRITU DE DENUNCIA

**A LA DIRECCIÓN XENERAL DE DEPORTES DE LA CONSEYERÍA DE
CULTURA, COMUNICACIÓN SOCIAL Y TURISMU DEL PRINCIPÁU
D'ASTURIES**

D. Isidro Baides Morente, con DNI (...)y domiciliu en (...), (Asturies), Presidente del Club Deportivo Básicu denomáu **GRUPU D'ESPELEOLOXÍA GORFOLÍ**, con CIF G-33.077.272, d'Avilés (Asturies), inscitu na Seición 2ª del Rexistru de Clubes Deportivos d'esta Conseyería de Cultura, Comunicación Social y Turismu del Principáu d'Asturies y miembru de l'Asamblea Xeneral de la **FEDERACIÓN D'ESPELEOLOXÍA DEL PRINCIPÁU D'ASTURIES** (Centru de Federaciones Deportives, Cai/ Julián Clavería, 11, d'Uviéu), pol Estamentu de Clubes; **D. José Luis del Río Fernández**, con DNI (...)y domiciliu en (...), (Asturies), miembru del Grupu d'Espeleoloxía Gorfolí y de l'Asamblea Xeneral de la Federación d'Espeleoloxía del Principáu d'Asturies pol Estamentu de Deportistes; **D. Xesús Fernando Manteca Fraile**, con DNI (...) y domiciliu en Cai/ (...), d'Avilés (Asturies), miembru del Grupu d'Espeleoloxía Gorfolí y de l'Asamblea Xeneral de la Federación d'Espeleoloxía del Principáu d'Asturies pol Estamentu de Téunicos; D. (...); énte esta Dirección Xeneral comparecen y como meyor en Derechu proceda, **DICEN:**

En cumplimientu la nuesa obligación básica de collaborar llealmente na xestión federativa, en cuantes que miembros de los muérganos federativos de gobiernu y representación de la mesma (art. 18.c) de los Estatutos de la Federación d'Espeleoloxía del Principáu d'Asturies), pol presente escritu venimos a **DENUNCIAR** énte esta Dirección Xeneral de Deportes los siguientes

FECHOS

PRIMERU.- D. JUAN JOSÉ GONZÁLEZ SUÁREZ, actual Presidente de la citada Federación d'Espeleoloxía del Principáu d'Asturies, **de forma reiterao y sistemático, lleva ensin convocar les preceptives Asamblees Xenerales Ordinaries nos caberos siete años** (dende l'añu 1996 al añu 2003), a pesar de la so obligación estatutaria (arts. 13, 25 y 30 de los Estatutos).

En concreto, l'artículu 25 de los referíos Estatutos afita: *«L'Asamblea Xeneral aconceyarase una vez al añu en sesión ordinaria, pa los fines de la so competencia y, como mínimo, pa l'aprobación del programa d'actividaes y presupuestu l'añu, asina como pa la lliquidación del anterior y l'aprebación de la memoria d'actividaes del pasáu añu»*. Sicasi, **los comparecientes** -miembros toos de l'actual Asamblea de la Federación d'Espeleoloxía del Principáu d'Asturies-, **nun conocen cuál ye l'actual estáu de cuentas**

de la misma, nin tampoco los estremaos presupuestos d'ingresos y gastos de los caberos exercicios. Y, por esta causa, la Xunta Direutiva d'esta Federación, vieno estableciendo de forma arbitrario les cuotes que tienen d'abonar añalmente a la mesma tanto los deportistes como los Clubes.

Estos fechos, al entender de los comparecientes, suponen una infraición pergrave, por cuantes que l'artículo 70.2 de la Llei 2/1994 del Deporte d'Asturies tipifica como infraición pergrave de los presidentes y demás miembros direutivos de los muérganos de les federaciones deportives:

- El reiteráu y manifiestu incumplimientu de los alcuerdos de los muérganos cimeros de gobiernu y representación, normes eleutorales y demás dimposiciones estatutaries o reglamentaries.
- La non convocatoria, nos plazos o condiciones llegalas y de forma sistemático y reiterao, de los muérganos colexaos de les asociaciones deportives, por quienes tean obligaos reglamentariamente a ello.

SEGUNDU.- El citáu D. JUAN JOSÉ GONZÁLEZ SUÁEZ **tampoco nun convocara entá les Eleiciones** na Federación d'Espeleoloxía del Principáu d'Asturies d'esti añu 2004, d'acordies colo afitao nel artículo 48 de los Estatutos y na Resolución de 27 de Febreru de 2004, de la Conseyería de Cultura, Comunicación Social y Turismu, pola que s'afiten los criterios que rexirán les eleiciones nes Federaciones Deportives del Principáu d'Asturies y desígnense los miembros de la Xunta Eleitoral Autónoma (BOPA de 9 de Marzu de 2004).

L'artículo 48 de los Estatutos, obliga a convocar eleiciones a miembros de l'Asamblea Xeneral y a Presidente de la Federación cada cuatro años, coincidiendo colos periodos olímpicos y *«ateniéndose a la normativa qu'al respetive dicte la Direición Rexonal de Deportes del Principáu d'Asturies»*. Y la citada Resolución, obliga a que los procesos eleutorales de les Federaciones de Deportes non Olímpicos -como ye la espeleoloxía- se celebren nel primer semestre de 2004 (puntu Terceru), y a que los mesmos tengan de tar acabaos anantia los de la so correspondiente Federación española (puntu Segundu). El compareciente estima que, si se tien en cuenta que les eleiciones na Federación Española de Espeleología fueron convocaes el día 01/06/04 y les votaciones tán previstes pal 02/07/04, la convocatoria d'eleiciones na Federación d'Espeleoloxía del Principáu d'Asturies nun va poder cumplir con esi mandáu.

Los comparecientes nin siquier tienen noticies de que la Xunta Direutiva de la Federación hubiere fecho un Reglamentu Eleitoral –como ye la so obligación-, pero lo que sí ye seguro ye que, d'habelu, esi reglamentu nun foi aprobáu pola Asamblea Xeneral, polo que nun podría ser ratificáu por esta Direición Xeneral de Deportes (arts. 49 de los Estatutos y 13 del Decretu 29/2003, de Federaciones Deportives Asturianas).

TERCERU.- L'actual Xunta Direutiva de la Federación d'Espeleoloxía del Principáu d'Asturies vien poniendo **serios pilancos del too inxustificaos a la tramitación de les llicencies deportives**. Esta situación xenera pergraves disfunciones na actividá los deportistes asturianos d'esta modalidá deportiva y pon en riesgu la so integridá patrimonial, al dexalos temporalmente albintestate, ensin la cobertura del preceptivu seguru deportivu.

Si bien esiste un “Conveniu de Delegación” suscritu ente la Federación Española de Espeleología y la Federación d'Espeleoloxía del Principáu d'Asturies en fecha 22/11/00 - ensin aprobación nin conocimientu de l'Asamblea Xeneral-, que delega la espedición de la llicencia deportiva española na Federación asturiana, el mesmu dexa perafitao que ye ésta la que tien la obligación de tramitar eses llicencies y, poro, la responsable de la so tramitación: «*La solicitú de llicencia de la FEE será tramitada pola Federación Asturiana d'Espeleoloxía nes condiciones qu'afita'l Reglamentu d'Espedición de la Llicencia de la Federación Española de Espeleología*» (Cláusula 1 del Conveniu de Delegación pa la espedición de llicencies deportives).

De forma reiterao y sistemático, la Federación d'Espeleoloxía del Principáu d'Asturies vien unviándo-y a la Federación Española la documentación pa tramitar la espedición de les llicencies deportives nos primeros díes del añu qu'entra, en llugar de facelo nos caberos meses del añu qu'acaba –o de forma inmediato, nel so casu-, polo qu'esisten dellos díes, al entamu l'añu, nos que dengún deportista asturianu perteneciente a esta Federación, cuenta cola preceptiva cobertura del seguru deportivu nel desendolcu l'actividá espeleolóxica, lo que pon en riesgu la integridá patrimonial de los deportistes, condergándolos a períodos d'inactividá forzosa.

CUARTU.- Arriendes de tolo anterior, dánse otros pergraves incumplimientos na xestión federativa. A mou d'exemplu, y ensin querer facer una relación completo, los comparecientes son quién pa citar los que vienen darréu:

1.- La paralización de les publicaciones federatives, delles dende hai más de quince años (p.ex. “Espeleología Asturiana”), a pesar de cuntar cola so correspondiente partida presupuestaria, supuesta ya impropriamente xustificada nos caberos presupuestos aprobaos.

2.- La paralización de cualisquier mena d'actividá de los muérganos téunicos y les comisiones especializaes coles que cuenta la Federación d'Espeleoloxía del Principáu d'Asturies (art. 40 de los sos Estatutos), a pesar de cuntar caún d'estos muérganos y comisiones cola so correspondiente partida presupuestaria nos caberos presupuestos:

a).- La Escuela Asturiana d'Espeleoloxía. Ello supón una pergrave dexación na obligación estatutaria d'enseñanza y divulgación de la espeleoloxía (arts. 6 y 7 de los sos Estatutos), lo que trai como consecuencia'l desinterés xeneralizáu, la desconocencia, l'escaecimientu y la falta d'un pernecesariu relevu xeneracional pa

la sobrevivencia d'esta actividá deportiva n'Asturies, ún de los más importantes llugares nos que se puede prauticar esta modalidá deportiva a nivel mundial.

b).- El Grupu Asturianu d'Espeleosocorru. Ello supón una pergrave dexación na obligación de velar pola seguranza de los propios deportistes nel desendolcu d'esta actividá deportiva, descoordinación y disfunciones con otres entidaes a les que se-yos atribúin llegalmente les competencies en situaciones d'emergencies y rescate nel nuesu país –como son los estremaos Servicios de Proteición Civil autonómicos, ente más otros-, precisamente nún de los llugares del mundu con mayor actividá espeleolóxica d'altu nivel y grave riesgu potencial, pola mor des les estremes condiciones físiques y téuniques de les nuses cavidaes naturales.

c).- La Comisión Científica Asesora. Ello supón una pergrave dexación na obligación estatutaria de fomentu y collaboración nos estudios científicos y téunicos relacionaos col mediu soterrañu (arts. 6 y 7 de los sos Estatutos).

d).- La Comisión de Catálogu y Zones. Ello supón una pergrave dexación na obligación estatutaria de coordinación de la distribución de zones de trabayu de los Clubes nel so ámbitu territorial (arts. 6 y 7 de los sos Estatutos), lo que trai como consecuencia la desconocencia d'abondes activideas y la ineficacia del trabayu desinteresáu de los deportistes nel Catálogu de Cavidaes d'Asturies.

e).- La Comisión de Conservación de Cavidaes. Ello supón una pergrave dexación na obligación estatutaria de defensa del padrimoni natural ya hestóricu (arts. 6 y 7 de los sos Estatutos). Nin siquier mos consta la intervención o collaboración de la Federación cola Alministración del Principáu d'Asturies na ordenación de la xestión de les estremaes cavidaes naturales declaraes como Monumentos Naturales, dientro'l Plan d'Ordenación de los Recursos Naturales d'Asturies (PORN); el casu más recién y anguañu n'execución: el proyeutu d'acondicionamientu y explotación turísticu de Cueva Güerta (Teverga).

f).- El Comité Disciplinariu. Ello supón una pergrave dexación de la obligación estatutaria d'exerciciu, por delegación, d'esta mena de funciones de calter públicu-alministratives (arts. 60 a 62 de los sos Estatutos), xenerando un insanu clima d'impunidá y falta de claridá, condicionando y paralizándolo dalgún espediente relativu a procesos eleutorales en dellos clubes d'esta Federación, iniciaos hai más de quince años.

QUINTU.- Los comparecientes entendemos que la competencia pa conocer de la situación xenerada nesta Federación deportiva asturiana a la lluz de los fechos equi denunciaos correspuende a esta Direición Xeneral de Deportes. Nostante, y nel supuestu de que non s'entendiera asina, procederá se remitan les actuaciones al muérganu alministrativu competente (art. 20.1 LRJPAC).

Polo espuesto,

SOLICITEN: Que, teniendo por presentáu esti escritu, dígnese almitilu, teniendo por formulada la presente DENUNCIA; téngase a los comparecientes como parte interesao, a quienes habrá dase noticia y treslláu de toles actuaciones que fagan; y previos los trámites llegalos en derechu procedentes, acuerde:

1.- La **SUSPENSIÓN CAUTELAR**, con calter provisional, **urxente ya inmediata** nes sos funciones de tolos miembros de la Xunta Direutiva de la Federación Asturiana d'Espeleoloxía, incluyú'l so Presidente D. JUAN JOSÉ GONZÁLEZ SUÁREZ, d'acordies colo afitao nel párrafu segundu de la Dimposición Adicional Primera del Decretu 29/2003, de Federaciones Deportives del Principáu d'Asturies. Y ello en cuantes que nel prósimu día 02/07/04 van a celebrase les eleiciones a miembros de l'Asamblea de la Federación Española de Espeleología; dada la pergrave situación nesta Federación deportiva asturiana denunciada nesti escritu, l'actual Presidente de la mesma -que pola mor del so cargu ye miembru natu de l'Asamblea de referida Federación Española-, nun pue cuntar cola más mínima representividá, al non convocar en tiempu y forma les Eleiciones nesta Federación d'Espeleoloxía del Principáu d'Asturies, d'acordies colo afitao nel artículu 48 de los sos Estatutos y na Resolución de 27 de Febreru de 2004, de la Consejería de Cultura, Comunicación Social y Turismu, pola que s'afiten los criterios que rexirán les eleiciones nes Federaciones Deportives del Principáu d'Asturies y désígnense los miembros de la Xunta Eleutoral Autónoma, tal y como quedara afitao nel Fechu SEGUNDU d'esti escritu.

2.- **L'almisión y práutica** de les siguientes PREBES, cola fin de contrastar, documentar y esclarecer los fechos denunciaos nel presente escritu:

a).- Proceder a la inspeición de los llibros federativos y de los presupuestos d'ingresos y gastos, n'especial (art. 69 de los Estatutos y párrafu primeru de la Dimposición Adicional Primera del Decretu 29/2003, de Federaciones Deportives del Principáu d'Asturies):

- El Llibru d'Actes, conseñando les de los aconceyamientos de l'Asamblea Xeneral, Xunta Direutiva, y demás muérganos federativos, con espresión de fecha, persones asistentes, asuntos trataos y acuerdos adoptaos.
- Los Llibros de Contabilidá, nos que figuren tanto'l padrimoniu como los drechos, obligaciones, ingresos y gastos de la Federación, precisando la procedencia d'aquellos y la inversión o destín d'éstos.
- Les Memories Anuales d'Actividaes.

b).- Dada la gravedad de la situación, ordenar la elaboración d'una auditoría financiera y de xestión, xunta un informe de revisión llimitada sobre la totalidá de los gastos federativos, por cuenta y cargu d'esta Direición Rexonal de Deportes, d'acordies colo afitao nel art. 68 de los Estatutos.

c).- Tomar declaración al Presidente de la Federación d'Espeleoloxía del Principáu d'Asturies, D. Juan José González Suárez, y a tolos los miembros de la so Xunta Direutiva, sobre los fechos equí denunciaos.

3.- D'acordies colo afitao nel párrafu primeru de la Dimposición Adicional Primera del Decretu 29/2003, de Federaciones Deportives del Principáu d'Asturies y nel art. 15 de los Estatutos, proceder de forma cautelar a la inmediata CONVOCATORIA, con calter extraordinariu, de los muérganos de gobiernu y representación d'esta Federación deportiva, elaborando un **calendariu eleutoral** que pueda ser aprobáu pola **Asamblea** asina aconceyada con calter extraordinariu.

4.- D'acordies colo afitao nel párrafu segundu de la Dimposición Adicional Primera del Decretu 29/2003, de Federaciones Deportives del Principáu d'Asturies, proceder de forma cautelar a la inmediata INCOACIÓN D'ESPEDIENTE DISCIPLINARIU a tolos miembros de la Xunta Direutiva de la Federación Asturiana d'Espeleoloxía, incluyú'l so Presidente D. JUAN JOSÉ GONZÁLEZ SUÁREZ, por parte del **Comité Asturianu de Disciplina Deportiva**, pola comisión de presuntes infraiciones pergraves a la disciplina deportiva, n'especial, aquellos tipificaes nel art. 70.2 de la Llei 2/1994 del Deporte d'Asturies, pol reiteráu y manifiestu incumplimientu de les normes eleutorales y demás dimposiciones estatutaries o reglamentaries, y pola non convocatoria, nos plazos o condiciones ilegales y de forma sistemático y reiterao, de los muérganos colexaos d'esta asociación deportiva.

5.- Dada la situación denunciada, el grave riesgu de menoscabu o destrucción esistente y la extraordinaria relevancia que pal padrimoniu cultural y natural d'Asturies tien **l'archivu documental y biblioteca** colos que cuenta esta Federación deportiva –con informes orixinales, planos, documentos y documentación gráfica y dixital qu'abarquen les estremaes esploraciones espeleolóxiques que tuvieron llugar n'Asturies dende hai polo menos cincuenta años-, se proceda por esta Conseyería a la inmediata y urxente INTERVENCIÓN cautelar del fondu documental y bibliográficu de la Federación d'Espeleoloxía del Principáu d'Asturies, procediendo a tomar les medides oportunes tendentes a la so conservación y salvaguarda, cola fin de que, posteriormente y si procede, pudiera ser declaráu como Bien d'Interés Cultural (BIC) o, nel so defectu, incluyú d'entro'l Inventariu del Padrimoniu Cultural, d'acordies colo afitao na Llei 1/2001 del Padirmoniu Cultural d'Asturies.

PRIMER OTROSÍ DICEN.- A efeutos de notificaciones, désignase'l domiciliu del compareciente y Presidente del Grupu d'Espeleoloxía Gorfolí, D. Isidro Baides Morente, (...).

SEGUNDU OTROSÍ DICEN.- D'acordies colo afitao nel artículu 4 de la Llei 1/98 d'Usu y Promoción del bable/asturianu, sobre usu alministrativu de la llingua asturiana y, nel exerciciu espresu del nuesu drechu a emplegar la llingua asturiana y a espresanos nella de pallabra y per escritu (art. 4.1 Llei 1/98), solicitamos téngase por válidu a tolos efeutos esti escritu de denuncia (art. 4.2 Llei 1/98), procediendo a lo solicitao nelli.

SOLICITEN OTRA VUELTA: Téngase por feches les anteriores manifestaciones a los efeutos oportunos.

N'Avilés, a 18 de xunu de 2004.

Fdo: Isidro Baides Morente

Fdo: José Luis del Ríu Fernández

Fdo: Xesús Fernando Manteca Fraile

Fdo: (...)